

Pemuda PAS Tolak Usul Anjur Bersih 4.0
Mstar Online
16 November, 2012
Oleh ARIFFUDDIN ISHAK

KOTA BARU: Dewan Pemuda PAS Pusat sebulat suara menolak usul untuk menganjurkan perhimpunan Bersih 4.0 bagi menuntut pilihan raya bersih dan adil.

Usul berkenaan ditolak selepas mengambil kira beberapa pandangan agar Pemuda PAS memberi tumpuan kepada gerak kerja bagi memantapkan jentera pilihan raya di peringkat akar umbi.

"Tak perlu adakan Bersih 4.0. Kami minta supaya usul bersih 4.0 ditangguhkan dahulu bagi memberi tumpuan untuk kita tawan Putrajaya.

"Kita juga berpendapat bahawa seharusnya Pemuda memberi tumpuan kepada program penerangan kepada ahli bagi menghadapi pilihan raya umum. Adalah lebih baik untuk ditumpukan kepada gerak kerja di kawasan masing-masing," kata Perwakilan Putrajaya, Salahuddin Zaini pada Muktamar Pemuda PAS ke-53 di sini, Khamis.

Terdahulu, usul berkenaan dikemukakan perwakilan Pemuda PAS Jasin, Aminuddin Abdul Jalil yang mendedak supaya pimpinan pakatan pembangkang mengadakan perhimpunan Bersih 4.0 bagi menghidupkan kebangkitan rakyat menghadapi pilihan raya umum ke-13.

Selain itu Salahuddin menegaskan penganjuran siri perhimpunan Bersih tersebut turut memberikan kesan kepada peruntukan kewangan selain pembaziran tenaga.

"Bersih 4.0 memerlukan tenaga dan mengambil masa yang lama, lebih baik tenaga yang ada kita fokus kepada pemantapan jentera parti," katanya.

Hakcipta Terpelihara © 1995-2012 Star Publications (Malaysia) Bhd

Source:

http://www.mstar.com.my/berita/cerita.asp?file=/2012/11/16/mstar_berita/20121115175851&sec=mstar_berita